



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Illvstri Regi Siciliae.

urn:nbn:de:hbz:466:1-20006

gamus, monemus, & per apostolica tibi scripta mandamus, quatenus Cardinales ipsos tanquam Legatos apost. sedis suscipiens humiliter & devotè, vel ad ipsos vocatus accedens, quæ tibi ex parte nostra duxerint proponenda, humiliter audias, & efficaciter prosequaris. Ad obsequium etiam nostrum & regni defensionem taliter accingaris, ut cum mandatum nostrum ad te iterum emanarit, nihil te prorsus detineat, quin, si necesse fuerit, nos sequaris, vel ad resistendum inimicis regni & Ecclesiæ iuxta dispositionem nostram procedas.

*PANORMITANO, CAPVANO,
Regin. & Montis Regalis Archiepiscopi,
& Episcopo Trojano.*

PRæter generale debitum officij pastoralis, per quod universis Christi fidelibus & singulis provinciis, in quibus nomen colitur Christianum, sollicitè cogitare tenemur, illa prærogativa dilectionis & gratiæ, quam prædecessores nostri circa regnum Siciliae præteritis temporibus habuerunt, & fidei ac devotionis sinceritas, quam idem regnum & Principes ejus ferè semper exhibuerunt apostolicæ sedi, ad providendum eidem regno specialiter nos inducunt: quibus nunc causa potior & urgentior supervenit, cum in clytæ recordationis Constancia Imperatrix carissimi in Christo filij nostri Friderici Siciliae Regis illustris tutelam & regni balium nobis testamento reliquit, & nos super utroque ab omnibus asscurari mandavit. Licet autem testamentum Imperatricis ejusdem nobis expectemus per vestros nuntios destinari, quia negotium dilationem non capit, cum Marcoaldus Dei & Ecclesiæ inimicus, persecutor regni, non dormiat, sed regnum perturbare immo etiam occupare cum suæ iniquitatis fautoribus molitur, dilectum filium nostrum G. sanctæ Mariæ in porticu Diaconum Cardinalem, apostolicæ sedis Legatum, virum utique providum & discretum, verum & veterem regni Siciliae amatorem, qui pro honore ipsius nullius erubuit faciem potestatis, quem inter fratres nostros speciali diligimus caritatis affectu, in Siciliam duximus destinandum, vices nostras ei tam super hoc quam aliis negotiis committentes. Credimus enim quod per dispositionem & providentiam ejus in fidelitate Regis ipsius & devotione nostra

regnum solidabitur universum, & malignantium perfidia confundetur. Ideoque fraternitatem vestram rogamus, monemus, & exhortamur attentius, ac per apostolica vobis scripta præcipiendo mandamus, quatenus Legatum eundem tanquam personam nostram recipientes humiliter & devotè, taliter ei super nostris & ejusdem Regis negotiis assistatis, quod in hoc manifestius appareat fides vestra, & ex eo tam piam Imperatricis dispositionem de vestro, sicut jam credimus, cognoscamus processisse consilio, quod eam non patiamini effectu debito defraudari. Nos enim nec labor personæ nec ulla negligentia revocabit ab illis quæ nos facere deceat, & tanto videantur negotio expedire. Attendentes igitur qualiter nobis & Regi teneamini memorato, ad honorem & salutem ipsius & nostram utiliter & efficaciter eidem Legato curetis adesse, dispositionem & statuta ipsius velut nostra recipientes humiliter, & inviolabiliter observantes, cum de sinceritate ac industria vestra indubitam fiduciam habeamus. Præcave vobis & regno ab insidiis Marc. qui licet aliud mentiatur, regnum tamen non Regi sed sibi usurpare contendit, & in vos & alios Teutonicorum cædes & suam & suorum injuriam vindicare: de quo non est aliquatenus diffidendum, cum etsi contingeret eum in regnum procedere, non tamen proficeret immo potius deficeret labor ejus; præsertim si Sicilia fideliter in ejusdem Regis fidelitate ac Ecclesiæ Rom. devotione persistat. Nos autem contra eum validum exercitum destinamus.

*ILLVSTRI REGI
Siciliæ.*

Quod prima primi lactis pocula tibi Dominus ab initio miscuit, quod vix bene balbutientem infantiam quasi continuata reddidit lamentatione disertam, & recenti pueritiæ non solum recentem sed & repetitum amaritudinis calicem propinavit, tibi tanquam speciali apostolicæ sedis filio specialiter condolemus, & tecum pariter & in te propinata tibi amaritudinis violentiam experimur. Recepimus enim per dilectos filios magistrum G. Subdiaconum nostrum & L. judicem nuntios tuos, viros peritos, providos, & discretos, tuæ serenitatis literas, doloris & gemitus expres-

*Epist. 365.
Consolatoria
super morte patris & matris.*

S f ij

sivas: quibus & patris decessum, & matris
 obitum, ætas tenerrima deploravit, ut
 pote quæ primùm utrumque flere didi-
 cit, quàm elementis plenè alterum nomi-
 nare. Nondum enim regalis infantia su-
 per morte patris consolationem acceperat,
 & dolorem antiquum superveniens
 doloris novitas innovavit, & pueritiæ
 tuæ primitias eorum deputavit exequiis
 quorum obsequiis secundùm naturæ ju-
 ra juvari debuerat & sollicitiùs & dili-
 gentiùs enutriri. Verùm pater miseri-
 cordiarum, & Deus totius consolationis,
 qui consolatur nos in omni tribulatione
 nostra, nobis & tibi super hoc consola-
 tionem obtulit salutarem, & in eo tibi
 consuluit in quo te visus fuerat aliquan-
 tum asperè visitare. Sanè ne, si parceret
 virgæ, te secundùm Salomonem vi-
 deretur odissè, aut si te non corripere, à
 dilectione sua infantiam tuam ostende-
 ret alienam, cum juxta testimonium sa-
 cræ scripturæ, quos amat arguat & casti-
 get, ut quòd te in primis infantia tuæ an-
 nis in filium adoptaret ostenderet, ætatis
 tuæ primitias misericorditer visitavit, qui
 castigat omnem filium quem recipit, &
 facit in tentatione proventum. Vt autem
 id evidentibus indiciis evidentius de-
 monstraret, Vicarium suum ad tutelam
 tuam misericorditer deputavit, patris
 defectum patre tibi digniore secundùm
 miserationum suarum multitudinem re-
 compensans, & matrem tibi meliorem
 restituens pro matre defuncta, eam sci-
 licet sub cujus capite læva ejus, & dex-
 tera ejus, sicut in Canticis legitur, am-
 plexatur: ut dum ipsa te sicut filium fo-
 verit, eum à quo castis confoveretur am-
 plexibus, ad tutelam tuam & protectio-
 nem inducat. Nos igitur, qui præter
 debitum officij pastoralis, quo sumus sin-
 gulis & præsertim pupillis & orphanis
 debitores, te tam ea ratione quòd incli-
 tæ recordationis Constancia Imperatrix
 mater tua nostræ te tutelæ commisit,
 quàm eò quòd regnum Siciliae ad patri-
 monium Ecclesiæ pertinet, diligere volu-
 mus & fovere, ad honorem & incre-
 mentum regni celsitudinis, statum re-
 gni, & fidelium tuorum profectum dan-
 te Domino efficaciter intendemus, &
 circa te paternam curabimus sollicitudi-
 nem exercere. Monemus igitur serenita-
 tem tuam, & exhortamur in Domino,
 quatenus omni penitus mœrore deposi-
 to, effugatis tristitiæ tenebris, exultes

in Domino, & in eo consolationis susci-
 pias medicinam qui pro temporali spi-
 ritualem tibi patrem providit, & in ma-
 tris obitu matrem Ecclesiam materna
 sollicitudine tuæ indoli deputavit, ut fa-
 ctus postmodum vir, & in regni solio so-
 lidatus, eam ampliùs venereris, per quam
 te cognoveris exaltatum. Dictos autem
 nuntios tuos serenitati tuæ propensius
 commendamus, quos magnificentia tuæ
 fideles & in commissis sibi negotiis exe-
 quendis sollicitos sumus & diligentes ex-
 perti, rogantes celsitudinem tuam, &
 monentes, ut eos intuitu benigno res-
 picias &c.

PANORMITANO
 Archiepiscopo.

Circa statum Ecclesiarum, in qui-
 bus est ordo regularis statutus, in
 melius reformandum sollicitum te cre-
 dimus & attentum ut, in eis ordo de-
 perditus restauretur. Sanè significavit
 nobis dilectus filius nobilis vir R. Co-
 mes de Agello, quòd bonæ memoriæ M.
 Cancellarius pater ipsius monasterium
 quoddam in civitate Panormitana fun-
 davit, & in eo fratres Cisterciensium indu-
 xit: quibus exinde recedentibus, Teu-
 tonicis monasterium ipsum per laicalem
 potentiam occuparunt. Volentes igitur
 ut eidem monasterio tua sollicitudine
 succurratur, fraternitati tuæ per aposto-
 lica scripta mandamus quatenus, si res
 ita se habet, amotis inde Teutonicis me-
 moratis, aboliturum inde ordinem Cister-
 cien. fratrum reformes. Quod si regula
 non patitur, pro eo quòd in civitate in-
 ter hominum frequentias est constru-
 ctum, cum consilio & assensu ejusdem
 Comitis & fratrum suorum fratres alte-
 rius ordinis in eo nostra fretus aucto-
 ritate instituas, qui Domino in eo jugi-
 ter famulentur, & regularia servant in
 perpetuum instituta. Datum Laterani
 VI. Idus Februarij.

MAGISTRO ET FRATRIBVS
 Hierosolymitani Hospitalis.

In totius Christianitatis dispendium,
 apostolicæ sedis opprobrium, & ani-
 marum vestrarum periculum controver-
 sia quæ inter vos & dilectos filios nostros
 fratres militiae Templi, super quibusdam
 possessionibus constitutis in tenimento
 Margati & Valeniæ, vertebatur, nocen-
 di magnitudine ferè universas hujus

Epist. 146.
 Curam & re-
 stauracionem
 monasterij Pe-
 normitanæ ar-
 mitit.

Epist. 167.
 Ut causam hæc
 contra fratres
 militiae Templi
 jure, non vi,
 proseguantur.